



6 NOVEMA 2023 ~ Lomiga 17 ~ Upega Tafailagi: www.ola888.com ~ Telefoni: 0210364322 ~ Tuatusi: ola.niupac@gmail.com ~ evaleon.books@gmail.com ~ NIUPAC Publication

# I TOTONU: FAITAU I LE TALA O LE FONO O MEASINA LONA IVA A SAMOA LE PAPA I GALAGALA



FONO LONA IVA MEASINA I LE PAPAIGALAGALA: Le Pule Sili Tuifuisa'a Prof. Patila Amosa sa'asa'a e tauluga ai le aso muamua fono

## Tauaao aloa'ia le ofo a le Nelson Properties i le NUS

E le fesiligia, o le tasi o 'ai o le Fonotaga Measina Lona Iva a le Lunivesite 2023, o lena o le tuuina atu aloa'ia o se tasi o mata'aga lausilafia i tala'eli o Samoa, le Pulemelei, mo le fa'aaogaina e le iunivesite i ana su'esu'ega.

O lea fe'au sa avea ai le tamaaiga, Tui Atua Tupua Tamasese Taisi Efi ma sui o le pulega, Nelson Properties, ma savali e faaleo ma molimoli atu i se tulaga aloa'ia. O le afiga i le Pule Sili, Tuifuisa'a Prof. Patila Amosa, sa talia le ofo mo le Lunivesite.

O le tala o le ofo ma le mana'o ua silafia lava e nisi o le 'aufaitau. Afua mai i ta'ita'i o le saofa'iga o le Laumua mataupu tau Samoa ua mavae, sa faailoa ai sea mana'oga. Ae sa lei iloga se tali mai a le tausimea, le Nelson Properties, o latou e umia le meatotino.

Talu ai foi le tulaga ma'ale'ale o le mataupu ona o le mau esee se o 'pule' i le fanua, sa faatali ai pea ma le onosa'i le a'oga i se laolao e saofia ai.

Talitonu la le Faatonu o Mataupu tau Samoa ma Tala'eli o Samoa, Ta'iao Dr Tautunu, o le laolao lenei, e pei ona faamalo'ulo'u mai ai le tamaaiga.

I le faaiuga ta'uta'ua a le faamasinoga i le 2008 na te'ena ai le finau a le afoaga o Palauli i le pule o le fanua, 1150 eka, e iai i totonu le Pulemelei. Talu mai lea, o loo iai pea le mataupu i se tulaga finauina, ui ina ma'oti le iuga i le pule, e au a le aiga o Taisi Nelesoni.

Ina ua faailoa se fuafuaga a le aiga mo le faatauina atu o le nofoaga, sa faaalua se taofi



O le foa'i o le Pulemelei, a le Tui Atua mo le Lunivesite, o se tali fiafia i le mana'o ua loa le faaleoina

o le alii faatonu o Tala'eli Samoa, talu ai, Meleisea Dr Malama Meleisea, e faasalaese ai. O lona taofi, o nofoaga e pei o Pulemelei e le tatau ona faatauina, ae tatau ona puipuia o se measina a le lalolagi.

Peita'i e iai tuutuuga e ao ona faamalieina pe a fai e avea le nofoaga ma se faasao i lalo o le faamalumaluga a le UNESCO.

O se vaega o na tuutuuga e iai le tatau ona avea le nofoaga ma se meatotino a le malo, e tatau foi ona iai le sao o pule na muamua i lona tausiga ma le faualoaina. Aulia mai lenei taimi, e le o masuiga malie le mataupu ona o lagona

o e o loo finauina le mataupu.

O le taua o le manino e fesoota'i tonu i le nofoaga ma lona tausiga ma le fa'aualoaina. E pei ona fa'aalia ni finagalo o le 'ausu'esu'e i le laumua Le Papaigalagala, e ao ona tausii lelei le nofoaga e latou ua iai tomiai faapitoa.

Talu ai le pule a le natura ma le taimi, ua iloa ai ni faaletonu, e pei o nisi o vaega o le tia ua solo, e tatau ona faalelei pea lava. Ua na o latou foi o iai le atamai faapitoa e mafai ona faia sea galuega.

Ae e le i avea ai le lagona naunau i le tamaaiga e fesoasoani i le sailiga o le mau a Samoa, e ala i se measina o loo umia e lona aiga.

TALA A'OGA I LE LAUMUA LE PAPAIGALAGALA: LEVI TAVITA

## O se ripoti mai le Fono lona 9 Measina a Samoa i Apia



O le faamoemoe sa lupe ma talosia e taiulu ma le pulega o le Laumua, Le Papaigalagala, na taunuu lava i le manuia e pei o upu o feiloa'iga, i lena vaiaso na se'i tuana'i.

E lua aso o le fonotaga, Aso Tofi ma le Aso Faraile, na tauaofia ai le mamalu o sui usufono mai Samoa e lua ae faapea Aotearoa ma nisi vaega o le kelope sa auai o latou sui.

Sa feiloa'i i le 'ava faatali na usu fa'aaloalo ai le Pule Sili ma le Laumua, ae faapea le Faatonu o le saofa'iga o mataupu tau Samoa, sa faia le nafa o le talimalo.

Mae'a lea ona alo atu ai lea i le sini o le faamoemoe i nofoaga sa togia, o le tasi e faafoe i le Gagana Samoa ma le isi i le Gagana Peretania.

O lauga aami o le faamoemoe o lena o le Minisita Lagolago o A'oga, Agaseata Tanuvasa Peto, ma le afioga i le Faatonu Sili o A'oga, Aeau Christopher Hazelman.

O le manulauti o le fonotaga, Tatala lau mau ina ia malamalama fanau mo a taeao. O lea sa tapuvaetasi i ai le faaso a lauga aami faapea le 'aufaipepa i aso e lua o le fonotaga.

Na faasopolia le tufa mai a'oga ta'itasi uma a le laumua, i le vao mataupu 'anoa o su'esu'ega sa folasia mo le silafia, o mau sa tatala faatatau i le aganuu, le gagana ae faapea le vao su'esu'ega mai saofa'iga e fia.

Sa iai pepa e faatatau i le suiga o le tau, o pepa i meatoto ma faama'i e aafia ai, pepa i meataulima Samoa ma le toe lalagaina, pepa i talaeli ma su'esu'ega faalotoifale, o tu ma aga tausilia ua toe lauliliuina. Sa lagona fo'i le leo o mataupu tau a'oa'oga ma le faatauaina o le vala'auina o ni faia'oga, e iai le pepa, Pe moni ea? O le faia'oga e tu i matagiolo? saunia e Tavu'i Dr Niusila Faamanatu-Eteuati.

O le sao o le faia'oga i le suiga o ausiga e le fesiligia, i lona tulaga o se ta'ita'i tautua, talanoa mai Muliagatele Rasela Tufua-Dolgoy, soa polofesa, saofa'iga o a'oa'oga. Taua fo'i le sao o matua i le faafitauli o fanau e tutuli e faatau oloa, pei ona folasia e Polofesa Tuiloma Taua'a, i lana pepa, Pusi pusi miao, o fea lau fanau?

Ae na matua lava le tuu i pepa tau le aganuu mai vaaiga eseese faatofamanino, ni isi e toe faapupula atili le mau ua tau galo atu, a o ni faauigaga fou o le mau ina ua faaaganuuina le tala Lelei pe faatalaleiina foi le aganuu.

E fai ma faata'ita'iga le pepa i le feagaiga saunia e le afioga ia Faalafitele Falefatu Enari, le tala ia Asomua ma lona fale, saunia e Faalogo Teleuli Mafoa, ma le foaga o le fanua ma taloloa, fofogaina e Ta'iao Dr Matavai Tautunu.

O Samoa ma lona vaifanua sa talaleomalie ai le solo a alii ma tama'ita'i su'esu'e a le Laumua, mai le lasi o vaaiga poo atalilo faa-Samoa o le pute ma lona gafa i le fanua, tuugamau na mavaea'iina ai tapuaiga a Samoa, le poto faavaifanua a Samoa, saunoa Sau'i'a Dr Louise Milo, ae faapea foi le mau faa-Tutuila ma Manu'a, e



Feagai segaula i taiulu o le lunivesite ma le sui usufono le Tui Atua, na mamalu ai le fono o Measina lona Iva



MEASINA I LE ASO LONA LUA: Le Afioga a le Tiakono, Pua Ielome Ah Tong pito i luma o le ata o usufono

fou fo'i i le faafofoga a le to'atele o sui usufono.

O nisi o pepa sa nanea ai le faafofoga o na i mataupu tau le ola maloloina i le mafaufau ma le tino. O se aotelega o le tala i faama'i o le mafaufau e pei ona fofogaina e Dr George Usufono Leao Tuitama. O le fesili i le sao o taulasea Samoa o se mataupu talanoaina soo ae mamafi ai pea le faaso i soo se taimi.

O taumafa paleni ma faama'i e fesoota'i i ai, e pei o le suka ma le toto mauuluga, o nisi pepa sa nanamu atili ai le faaso lautele i o latou itu lelei. O le ma'i foi le failele gau e le ese ma le Gagana pe a faatamala i lona tausiga, finau mai Fiu Leota, faia'oga sinia Saofa'iga Mataupu tau Samoa. O le ata lea o le ma'i sa ta'ua foi e le faia'oga ia Loimata Poasa, i le le a'oa'oina o le Gagana Samoa i le Tausaga 12 ma le 13.

A tulimata'i le soofau, e mauuluga pea le faanaunauga e taofiofi mau le Gagana, pe a matau aga o ausiga faaleiloga, e le gata i le Gagana Samoa a o le Igilisi fo'i. O le pepa a le tama'ita'i faia'oga, Prof. Sina Vaai ma lana 'au, e aga'i tonu i sea to'atuga. English Matters Too, sa folasia ai sea atugaluga mo fanau a'oa'oina i totonu o le laumua. E taua foi le literasi o le Igilisi, pei lava o le popolega i le Gagana Samoa.

Afai o le Gagana o le tofi mai le Atua o ia lava le Upu, ona le tau faanoia lea pe sisi'o i le le maua'a i le faa-Samoa ma le Gagana poo Gagana e lua ua fai ma tofi, pei o le si'uleo malie mai le usugafono a Sasa'e.

O alaga'oa faavae a le Gagana e iai le Tusi Paia e le masuia, le autu o le faaso a Tupa'isiva Tamari Mulitalo-Cheung. Ae sa fa'aalia le mau a le alii faife'au-faia'oga Rev. Malotau Lafolafoga, i le 'alofia o Pese a Solomona, i le faitauga tusi a Samoa, o se le faaaloalo i le afioga a le Atua.

E lua ni pepa na faasalaese e fai ma sui i mataupu tau upufai o le malo Samoa, o lena a Leaula Dr Desmond Uelese Amosa, i le fesili pe tatau ona palota mai Samoa aumau i fafo i faiga filifiliga a le nuu moni. Sa laga ni isi fesili 'anoa e su'esu'e ai se tali 'anoa o le fesili, e iai lenei, Afai e palota, pe tatau la ona togi lafoga i latou?

O le pepa lona lua o lena i le nofoapule i Samoa, sa finau mai ai le faipepa (tusitala o lenei ripoti), i le tulagaese o Samoa i lena saofa'iga o le nofoapule, e faailoa manino ai nisi o pule e iai le Lotu, ui ina le taulagia, ae o loo iai lava.

Sa mamalu le faamoemoe i le auai o le Tui Atua. Na ta'ape malilie le fono, o le gogo ma si ona faiva, e fo'i ma ia i lona tula mauga.

TALA A'OGA VAIFANUA MAI LE PAPAIGALAGALA NUS: SAILI AUKUSO

# Fiafia e faafeiloa'i atu le pule o le fale mataupu tau Samoa Ta'iao Matiu Dr Matavai Tautunu



O LE TAEAO FOU MA LANA PESE, o le lou ma lona fuata e faapena lava le gasologa o le soifua tautua, e pei ona iai lenei avanoa taua e faatalanoa ai le

Pule Faatonu o le Nofoga Tutototonu o Mataupu tau Samoa i Le Papaigalagala.

E taua lenei avanoa mo le silafia a le mamalu o le tatou 'aufaitau, i le o loo tu i matagi'olo i lenei itula o le taimi, i lenei tofiga taua.

E fa ni fesili na faavae ai le talanoaga, e fia malamalama i le tulaga o le galuega i totonu o le nofoaga ma le faatinoga o le tautua mo fanua ma le atunuu o loo autovaa atu ia latou a'oga ma su'esu'ega. Atoa foi se silasila mamao a le alii pule i le lumana'i o le aganuu ma le Gagana, i le isi 10 tausaga ma luma atu.

E fiafia e faafeiloa'i atu le Tofa ia Ta'iao Matiu Dr. Matavai Taunuu, i le mamalu o le tatou 'aufaitau.

Fesili: E mafai ona e saunoa i le tulaga O le nofoaga tutotonu o mataupu tau Samoa, i lenei vaiata o lou pale mai i lona ta'ita'iga?

Ta'iao: E muamua sa'u tala i le ata atoa lava ia o le galuega, e tilotilo lava i Ta'iala, e iai Faiga Faavae e mulimulita'i ai le faiga o fe'au. O la tatou fuafuaga autasi o lea e ta'imua ai la tatou laumua ua ta'ua o le Centre of Excellence. O le ala foi lea na mafua ai le fa'atu ia faavae se Laumua e feagai ma le su'esu'ega e fitoitonu ia

Samoa, e le gata o le aganuu ma le Gagana ae fa'apea fo'i ma mataupu tau le atina'e o le atunuu. O mataupu fo'i na e tau i le soifua maloloina, mataupu tau le tamaoiga ma isi mataupu.

La lea i lo'u foi tula'i mai, o le vaaiga lava lea, e le pumoo le tilotilo i le uiga o le upu aganuu poo le Gagana, ae o se aotelega o le soifuaga faa-Samoa i lona atoaga ma le aoao tetele. E le na o le Gagana faamatai a o isi foi vaogagana e pei ona ou ta'ua. E iai lu'itau ae e iai foi auala e tali atu ai.

Fesili 2. O a ni lu'itau i sini ma faamoemoega o le laumua, aemaise o le nofoaga e taula mai i ai le sailiga tomai a le atunuu—Samoa ma fafo atu o Samoa?

Ta'iao: O le lu'itau tele lava, e le o lava a tatou resources [alaga'oa], e le o lava le faaoloina o vaega na e fa'atino ai a tatou galuega. O le uiga o la'u tala e iai a tatou palapala 'eli ae le o iai se tatou faia'oga faapitoa (archaeologist) e fa'apea ona faia iloilogaga ma su'esu'ega auiliili i mea e fai i ai a tatou sailiiliga faasaenisi. O lea ua maua mai a tatou palapala a o lea e ave i lunivesite i fafo e iai Niu Sila i Aukilani ma Otako e su'esu'e ai.

O le uiga o la'u tala, o le mana'oga ia siitia tulaga ma fa'ailoga, a e le o lava a tatou Human Resources [aufaigaluega]. O le fa'anaunauga lava ia avea lo tatou Laumua e taula'i mai i ai

sailiiliga.

Fesili: O le a se fa'aaliga mamao mo lau afioga mo le Laumua o Mataupu tau Samoa i le lumana'i?

Ta'iao: O le itu tele lava ma taua o loo ou tilotilo a'u i ai, o le tulaga ua le toe pumo'o se faauigaga o le nuu Samoa ma ana faia'oga faalekope. E taua i lo'u mafaufau le mea lenei, auā e moni lava o la ua a'oa'o le Gagana Samoa i Niu Sila, Hawaii ma Amerika Samoa, a oinei o loo iai le fa'a'autama o le Gagana ma le aganuu.

O lea ou te tilotilo i le ata o le taimi e mafai ai ona faao'atu le tautua a le NUS ia Samoa aumau, faata'ita'iga o ni courses o le Gagana Samoa i atunuu i fafo e pei o Niu Sila ma Ausetalia, auā o la e iai le mana'oga. E pei la o polokalame ia a tatou ua ta'ua o le microcredential. O lea ou te mafaufau e fa'aofi i la tatou polokalame, e mafai ai ona tatou o e faao'atu le mau i o tatou tagata la e i fafo, lea la e malosai ai le mea lea o le a'oa'o ma le su'esu'e.

Auā e le o mafai ona o tagata la e i fafo i le mea lea e iai le Fāfā o Saualii, Tulagavae o Moso, ma o mai e o i tuā i mea e mafua mai ai alagaupu, ma muagagana. O la e na o le talanoa ai fafo, a o loo tele lava se vaega o la e misai, e avanoa ai lo tatou o atu e tufa atu le fa'asoa lea, auā o lea na tatou o i le mea na tagi taeueu ai Apaula. E pei o le tusi lena mea, o lea ou te tilotilo iai i le lumana'i o le laumua o lo tatou aga'i loa i fafo.

*Faasoa o le Vaiaso: Dr Levi Tavita*

## Tatala lau mau auā fanau lalovaoa

E LE FOU LE VALA'AU A LE IUNIVESITE mo i latou o iai le mau e tatala mai auā fanau lalovaoa. Talu lava ona faavae le a'oga a le atunuu, sa afua ai foi se na tatalo, ma e faigata ona iloa e lenei puletini se gasologa i luma, ona o le le mautomai i le mataupu.

Ae mautinoa e tele se vaega o lena mau ua mafai ona pu'epu'emaui faamau o pepa, viteo, ata ma le vao faamau faatekonolosi e taofi ai mo e luā. I totonu o le nofoaga tutotonu Mataupu Tau Samoa e maua uma i ai tusiga o Siena (Journals of Samoan Studies) mai le amataga, e molimau i lena galuega taua fa'aaau. Ae sili lava, le mau e taofi e fanau o loo ulufale ma apepele e i latou mo e lua.

Ae e mautinoa foi le tele o se maumau ona o le 'augata e tatala mai le mau, ona o atu lea ma e o loo mau i le mau i le tuugamau (tulou), ma galoma atu ai.

O le talanoaga i le 'augata ma le musua ua leva foi ona tatou faalogo i ai, ae e fesoota'i i se taofisa e faapea e ao ona taofiofi le mau a se nuu poo se aiga ona o mafua'aga e fesoota'i i tapu ma sa o ni suafa e fesoota'i i ai, molimau tusiga a nisi o misionare. La lea sa tasi lava faamisiterio le mau a le aiga ia, le nuu, le malo.

Se'i avea papalagi, i misionare ma alii su'esu'e mai fafo o ni e na matala ai ia Sega se vaega o lena mau taofiofi. O lena faasoaga o le mau, mai le sagolegole o papalagi, ua avea o se faamanuiaga mo le to'atele.

E mafua ai le fesili, pe se a le togafiti a i latou na faigofie ai ona tatala mai le mau a tua'a, ma faapea ona tusitusia ma faamauiina?

O le tali a le alii faia'oga, Dr Sam Amosa, o le fefaatauaiga i le va o papalagi ma o tatou tagata. Tuu atu se oloa e iai tapa'a poo se fa'ata ae aumai le poto ma le mau. Avatu le tofiga fou ae aumai le fanua poo se tasi measina.

Faapea mai le alii faia'oga, e le i foa'iina fua le mau, sa tatala le mau ona o se tau lelei sa manatu tua'a ua talafeagai ma le faatau. E o'o lava i foa'i, sa faia lava i lena manatu, e iai se

faamanuiaga e maua mai ai—pe faaletino, pe faaleagaga fo'i.

E foliga o le agaga o le fono lona 9, ina tatala atu le faasoa i tamalii ma ponao'o i alalafaga, le 'aufueloloa ma le 'aufaitofa o loo tausia le mau a Samoa.

E mafua ai le taofi o se tasi tamā matua, Ana se mea e ofo atu ni nai tau mo i latou, e le pine e o mai. O nei foi aso ua taugata le poto ma le silafia, saunoa le tulafale. Ae a pe a vala'au ni isi o toe 'ulutaia e affio mai, ona ua iloa le 'augata e auai pe a le vala'aulia. Pei a o le agana masani, pe iai se mea e maua ai; tele pe itiiti, ae e faapena aga o soo se fefaataua'iga.

E foliga o le tatalaga o le mau o loo taulamua ai pea a'oga ma faia'oga, avea ai le Saofa'iga o le Laumua o Mataupu Tau Samoa ma taulaga o lena fe'au. O sea fe'au e le laitiiti, pe a manatu i le mana'omia o se nofoaga faavaomalo e taula mua i le so'oso'oina o faalau o le upega, e pei ona atagia i le finagalo faaali o le Faatonu o le Laumua o Mataupu tau Samoa. E leai se nofoaga autu e tusa le onomea ma le Laumua, Le Papaigalagala, na te faia o lea.

O se lagona, e le tatau ona tele ni mau, e tasi a le mau a Samoa. Pe felanulanua'i molimau ae tasi a le tala o Samoa, i ona tagata, le fanua le Gagana ma le nuu o le igoa Samoa. Tainane pe vaeluaina Samoa i ni pulega malo se lua, ae e tasi a le faasinomaga i lo tatou tala ma le faatuatua.

O le finau lea a le tatou iunivesite, e pei ona atagia manino i le sini autu o le Measina lona 9. E le tu le taofi eseese ma le manatu faumalo pe a folasia manino o na vala i lumamea, i le agaga o le tagata suesu'e faamaoni, e saili le mea moni, o le finagalo lea o le Atua.

Atoa fo'i lenei, o le mau a se atunuu e iloa i lona fetala'i, e sauni e tatala i le taimi e talafeagai ai. Pei ona saunoa Tupua, o le faa-Samoa e tatau ona talimana'o mo le fanau. Talitonu foi le Faasoa o se sini aupito moomia lea mo soo se mau faalenuu, ia avea o se mea e faailogaina ai ma mitamita ai. O se mau e faaosofia ai le loto e fia fai taulaga mo le atunuu.

## Ta'iao Dr Matavai



Fesili 4: E mafai ona e saunoa i lou faasinomaga faaleaganuu/faaleaiga ma faalealuega foi? Aemaise o lau ausiga tutasi o le ulua'i foma'i tofamanino saunia lona tusiga i le tatou Gagana i le lalolagi?

Ta'iao: O a'u lava taumafaiga, na su'e lava i la tatou iunivesite. Ou te le i alu i ni iunivesite i fafo e su'e ai. Sa su'e lava o'u fa'ailoga i totonu o la tatou iunivesite ma lo'u talitonuga i lo tatou lava punavai e le faaluaina. E iai lava le taimi e aulia ai lena maua o tapulaa o le tulaga o iunivesite ua leva. Ae o lea o loo aga'i atu lava i ai e ala i le soosoo tau'au ma le tele o iunivesite i fafo e iai na a Niu Sila.


A fua i le taimi na faavae ai le tatou iunivesite, o lea lava sa amata mai i le Certificate, a o lenei ua ausia fa'ailoga i le tikeri aupito maua, i le PhD. Ua pei ua avea la'u ausiga, o le tusiga o se PhD i le Gagana Samoa, ma mea ua ea ai i luga le vaai mai a nisi iunivesite i fafo. O Samoa mai fafo, ma iinei fo'i ina ua iloa e mafai ona fai, o lea ua amata mea lo'u nei tagata fa'atauva'a.

O le taimi nei ua 21 a'u lomiga [publications]. O articles ua uma ona tusia ma tusi e 3. ma lea ou te galue ai. Masalo o le vai taimi o Tesema ma Ianuari ou te alu ese ma le atunuu e fia fa'auma ona tusi ona tau fuafua lea o se vai taimi o Aperila 2024, e fa'alauiloa aloa'ia ai, pe a maua foi se taimi e tatala ai i Ueligitone.

E le tuua foi le tiute tausaiaga. E tua lava tatou i faalavelave, ae pei o le potomasani lena na aoga tele i la'u malaga ma ausiga i totonu o le Laumua nei. Ua 16 nei tausaga talu ona ou galue i la tatou Centre. Ou te sau o a'u lava le tagata laitiiti, ma lo'u talitonuga e sau foi le taimi e mavae atu le vaega matutua, ae fa'aaau pea le tautua; lea fo'i ua ou tula'i mai a'u.

Fesili: Se finagalo mulimuli o lau afioga?

Ta'iao: I lo'u tulaga o le Faatonu, o ava ua ou iloa e tatau ona faatumu mo le siitia pea o le tatou galuega ma le alualu i luma. E le gata i lo tatou atina'e iinei a o fafo pei ona ou ta'ua. E taua le auvaa. O se lu'itau lea ina ua faamavae atu ia Penny ma Malama – Faapefea ona fa'aaau. Ia e faafetaia lava le affio mai o afioga i foma'i nei, ou te talitonu o le a fesoasoani i le faatumuga o lea ava tele i tausaga, tomai ma potomasani faalealuega, talu le tuua o le galuega e le alii polofesa ma le soa polofesa.



# Ne'i Mea Ane ua Galo

## Avefu'a Samoa i le fusu

**G**ATOAI LE 23 tausaga talu ona tu'itu'i se alii fusu Samoa i le faitoto'a o le nofoalii o le siamupini o le lalolagi. (E iai isi na muamua ae e i lalo ifo a latou 'aupaga).

O lea avanoa na maua e To'aleta'i David Tua; ma ua silafia e le mamalu o le aufaitau le faaiuga. Malo le siamupini Lennox Lewis i 'ai. Lewis o se tasi o siamupini iloga o le taaloga, e i totonu o le 20 suafa o siamupini ta'uta'ua o le fusu—pe a le o le 10—i lona tala faasolo.

Na feiloa'i ma David Tua i taimi tonu o le osoosoga o malosi ma tomai o alii fusu. Tua i lona 28 a o Lewis i lona 35, faatasi ma ausiga mata'ina i o la suafa. O lea avanoa na toe ofoina i se tasi alii fusu Samoa, Lupesoliai Joseph Parker, iamulimuli ane, ma ua silafia foi le iuga.

E tali tutusa alii Samoa i taimi na avanoa ai, Parker i lona 26, a o le siamupini, Anthony Joshua e 29. Taufai atoatoa faamau a alii fusu o le aunoa ni faia'ina. Ae na malo Joshua i 'ai i se taaloga e tali foliga tutusa ma lena o Tua ma Lewis. I le faalogologo atu i faasoa a le automai i le taaloga, e iai ni mea taua e pu'e mai ai.

Muamua o le taimi. E foliga e taufai le laki Tua ma Parker i le taimi na avanoa ai mo le lu'i. E fetau i la avanoa ma le tutu mai o ni siamupini faigata i le taaloga. O ni fili nei e le faigofie ona faato'ilalo. Lua, o lu'i nei e foliga ua faamaonia ai le upu e le sili a'e le talavou 'aumalosi i le matua ma le potomasani. E 7 tausaga le matua o Lewis ia Tua ae 3 e matua ai Joshua ia Parker. Ae e lei iloga se na eseese i le faatinoga o le taaloga; pau le eseese na manino, o le potomasani o le e matua.

Iuga, na alala pea le siamupini i lona nofoalii, ae mo Samoa ma le Pasefika, atonu o se isi 20 tausaga pe a ona toe maua lea o se avanoa. Atonu o se Toga o le a so'oa le fau mo le Pasefika.

Ui lava i lea, o le aulia e nei alo o Samoa o le lu'i e gata ai, o ni ausiga e le laumaua. Mo David Tua, o le maualuga lea o lana finau mo le tau ai ausigata pe a toe tepa i tua. E lei toe maua sona avanoa e ui ina sa taumafai pea—iloga foi ni manumalo a o taupati atu mo se avanoa lona lua.

Na feiloa'i Tua ma Lewis i lona 28 faatasi ma se faamau iloga o malo i igoa e pei o Ruiz, Moorer, Maskae, ma Rahman. Lewis e ono faatusaina i le isi foi alii Peretania o loo tula'i mai, Joshua, i lona umi atoa ma tomai i le faatinoga o le taaloga. Na mafua ai ona faatusatusa e nisi se fetauiga i le va o Joshua ma Parker lea na tupu lava. Tele taofi sa fa'aalia i le iuga o lena fetauiga a Tua ma Lewis. E faamautu ai le tilotilo a le to'atele i le faigata ia Tua se paga e maualuga ma uumi lima, faamaonia lea ia Lewis ma le alii Rusia o Ustinov.

Ae ese le mau a lana faia'oga sa galulue i lea taimi, Kevin Barry; e manatu Barry e fiu e mafai e Tua ona faato'ilalo. O lana molimau e faamanino ai le tulaga eseese o tama fusu i le pulunaunau. Iai nisi paga a Tua e uumi atu ae na malo ai, pei foi ona matauina i le faiva o Parker nisi e pei o le Rusia lea faato'a te'a atu. Ae le faatusalia i latou i le liki e iai Joshua ma Lewis; e le gata i le maualuluga ma tinolelei ae maualuluga foi ma tomai i le faiva.

O le uiga o le molimau a Kevin Barry, e iai le avanoa o Parker ona o lona uiga faaali (attitude) e mafua i lona talitonuga na te mafai ona faatoilalo soo se tasi e tu mai i

# O LE ASO I LOU TALA FAASOLOPITO

SAMOA HISTORY

"Ne'i mea ane ua galo"

Copyright Reserved LPSTavita

## ~ NOVEMA 1-15 ~

1  
1847 Tatala misiona LMS motu o Ta'u i Manu'a

3  
1842 Fasiotia a'oa'o Samoa Lasalo ma Taniela i Paina i Niu Kaletonia

1903 Faavae ulua'i falemeli itumalo Mulifanua

1928 Faavae Ekalesia Samoa LMS

4  
1910 Faamau le iai o le manu 'ainiu i Samoa

5  
1839 Tusia e Charles Wilkes ni tulafono taiala mo fefaataua'iga i le taulaga i Apia

6  
1839 Tuua Samoa e le Kamateni mo le tala'iga nuu Melanesia; Pasee: Ioane Viliamu & A'oa'o Samoa e 12

1903 Faata'oto faavae o le falemeli, malo i Fagamalo, ulua'i falemeli i Savaii

1975 Faavae sootaga faa-malo i le va o Samoa ma Saina

7  
1918 Taunuu i Apia le vaa la'u uta SS Talune ma aumai ai le siama o le fulu Sepania

8  
1880 Tuumalo Malietoa Talavou

1899 Malie Siamani e faamatuu ese atu lana

pule ia Toga, Niue ma se vaega o le Atu Solomon i le faia o lea fo'i e Peretania ia Samoa

10  
1954 Amata aloa'ia tapenaga Fono Faavae

11  
1911 Aso fanau Vaai Kolone, palemia lona fa

1941 Malii tusitala Motu o Samoa, August Kramer (Kalama) i Stuttgart, Siamani

2000 Las Vegas. Fusuaga David Tua Lennox Lewis mo le fusi; malo Lewis

2001 Landsdowne. Taaloga Sikotilani ma Samoa, Malo Sikotilani 35-8

12  
1898 Folafola tupu o Mata'afa e Leulumoega

13  
1850 Aso fanau Tusitala (Robert Louis Stevenson). Fanau i Edinburgh, Sikotilani

14  
1899 Saini maliega e sui o le komisi malo e tolu i luga o le USS Badger e vaelua Samoa

15  
1898 Faailoa tetee a Malietoa ma Tui Aana Tamasese i le alagaina o le tupu o Mataafa

1957 Ulua'i palota mo le paea'iga muamua palemene. Na o le 10 itumalo i le 41 na auai.

1978 Malii Margaret Mead i Niu Ioka, tusitala o le Coming of Age in Samoa



ona luma. Ae faapea mai Lance Revill, ua fai si vave o le 'a'e i luga a Parker i le liki lea e fua i lona matua. Atonu la e sa'o Revill i lena feupua'iga


ma Barry, molimau le iuga o le taaloga.

Ae 'a'ua ne'i galo sa au ni a tatou tama se to'alua i le tumutumu o faigamea, i le paga mamafa. Muamua, Jimmy Thunder, na ia

umia le fusi o le WBF ma lena o le IBO. O le fusi IBO ua avea nei ma se tasi e taua i le tuu faatasiga o fusi o le paga mamafa. Lea sa umia e Lennox Lewis, Wladimir Klitschko, Tyson Fury, Andy Ruiz Jr ma Anthony Joshua.

Lona lua le alii o Maselino Masoe, mo le paga ogatotonu, na ia faoina le fusi a le WBA mai ia Evans Ashira o Kenya i le 2004.

Ae le ta'ua suafa pei o Tuna Scanlan, Ali Afakasi, Monty Betham, Laavasa Sagaga, ma isi na asa le gasu mai tausaga 60 ma le 70. O i latou uma o avefu'a ta'uta'ua a Samoa e ala i le taaloga o le fusu.



Malietoa Tanumafili I ma Tupua Tamasese

**UILI FAU UPU**

Saili tali o fesili o lo’o i lalo. Pule oe pe sipela i luma (clockwise) po’o tua (anticlockwise).

E sa le feosoosofa’i.

1. Tusi mai se uiga o le upu *tino* i le 1. Samoa 2. Igilisi:

\_\_\_\_\_

\_\_\_\_\_

2. Sa’ili ni upu se 5 e faai’u i le fasiupu *no*

\_\_\_\_\_

\_\_\_\_\_

3. Su’e se upu e 9 mata’itusi ma tusi sona fa’amatalaga:

\_\_\_\_\_

\_\_\_\_\_



4. Tusi uma upu/ fuiupu e ta’i 3-9 mata’itusi, ma o latou soa i le Igilisi (E faitau ai ma upu ta’ua i le 1, 2 & 3)

*Lelei atoa* = 12 upu

*Lelei tele* = 8 upu


*Lelei* = 6 upu

\_\_\_\_\_

**PASO I GAGANA E LUA /17**

Faatumu i upu/igoa Peretania e soa tutusa (va’ai i le fgt.)

Fill crossword with English words/names



©LPSL TAVITA

**Faalava ~ Across**

- 1 totonu o le fale (6)
- 4 Capital of Samoa (4)
- 8 fatusolo (4)
- 9 aulelei (6)
- 11 **molimau i se maliu (6)**
- 12 u’amea (4)
- 14 Tausaga lumana’i le Mesia (2)
- 15 Igoa muamua: tamaitai tenisi \_ Williams (6)
- 19 e fa’avavau (4)
- 22 tikeri muamua (2)
- 24 pola (5)
- 27 atoaga (5)
- 28 vaai maualuga a se tagata ia te ia (3)
- 29 Lakapi: ’au Atenetina (5)
- 30 Mose (5)

**Lalo ~ Down**

- 1 ofo, faafiafiaina (7)
- 2 o se e mau i se nofoaga (7)
- 3 ia (2)
- 5 Peteru (5)
- 6 ituaiga tagata Europa (5)
- 7 Upu Maori mo le ola (3)
- 10 igoa o se tama Aealani (4)
- 12 aisa (3)
- 13 tasi (3)
- 16 tuna (3)
- 17 iuga (3)
- 18 Aulakapi a Niu Sila (2)
- 20 palota (5)
- 21 tiute, matafaioi (5)
- 23 atoma (4)
- 24 avanoa (3)
- 25 O a’u (1,2)
- 26 Short: Desmond (3)

**API the Word Builder**

**Rules:**

- 1. Build as many English words as possible, start with three letter words.
- 2. Every word you build must include the Alpha Letter (centre).
- 3. Each letter is used only once, including the Alpha Letter.
- 4. The class as individuals or groups can play this game. 1 point for one three letter word, 2 for four letter word, 3 for five, and so forth.



**Three letter words**

\_\_\_\_\_

**Four letter words**

\_\_\_\_\_

**Five letter words**

\_\_\_\_\_

**Six –seven letter words**

\_\_\_\_\_

ADDITIONAL ACTIVITY: Make a list of other words that are spelt without the Alpha Letter E.g. CUE


**SUDOKU ~ TAALOGA I NUMERA**

(sudoku.com)



# ~ TAALOGA PASO SAMOA I LE GAGANA SAMOA ~ POTO LAUTELE ~

1. Faatumu le pusa i upu/igoa Samoa poo se tasi e faatonuina.
2. E maua le faailoga \$100 mo sē e muamua faatumuina le paso i lona sa’o atoatoa (Totonu o le vaiaso 1).
3. E leai se tasi na maua le faatulagaga sa’o o le paso lomiga 15.



Copyright LPSL Tavita 2023

**FAALAVA ~ ACROSS**

1. Faalupega o le ta’ita’i Siamani, taimi o pulega a Siamani (6)
4. Numera faamanatu o le tuto’atasi o Samoa (9)
8. leo e iloa ai se nuu (6)
13. Suafa atoa Ao o le malo o Samoa: Tuima \_ (10)
16. Palemene Samoa: suafa matai o Kalapu, sa fofoga fetalai (11)
19. ‘Ava feiloa’i: se tu masani a o le’i inua le ‘ava (6,2,3)
20. Se mala faalenatura pe a malosi le la (6)
21. ua iai uma tagata o le fono (4)
22. pu’e se faamatalaga (3)
25. alu i le taeao e galue (3)
26. se matai faiupu i Salani (5)
27. e faaola ai le taavale (3)
29. e gata mai ai (3)

30. se laau aoga fofo ai ma’i (2)
33. to le fale’ie ae a le palolo? (2)
34. Suinauna peresona tolu (2)
35. Se alii avepasi a Polo ta’uta’ua i lana faasoa (2)
36. Se malaefono aiga Sa Tuala (8)
37. Vaolia Samoa: teu le ā? (2)
38. Faamalie le finagalo/loto (4)
40. Se itumalo Samoa: I le motu o Salafai (4)
43. se mafutaga a ni autalavou (3)
45. Suafa lotu lausilafia: Sa avea ma katinale Katoliko (3)
46. Talatuu Pasefika: le alii na faato’ese ia Tinilau (2)
47. Mutaaga o le ola (3)
48. Le isi igoa o Tiitiatalaga (4)
49. se ma’i e pepesi ma pipisi (6)
50. se vaega o le vaaalo Samoa (2)
53. tali musu (2)

55. Pese: O le nuu o ai e o ifo i ai ma mapu ai? (3)
57. se nuu i le motu o Manono (4)
58. Suafa matai o se palemia a Samoa a o soifua (7)



60. Se sikola Samoa tusia le tusi, O la ta gagana (7)
  63. saili le mamafa (3)
  65. Faalupega: se aiga afioaga o Malie: Sa \_ (10)
  66. Lotu: vaega lona lua o le tatalo (10)
  68. le isi vaega o le mea atoa (3)
  69. Tusitala Samoa: Na tusia le tala Maunu mai loimata o Apaula: Tunumafono Apelu \_ (6)
  70. se faga itu i sasa’e o Upolu (7)
  71. Tusi Paia: manulele faatusa i ai e Isaia le tagata faatalitali malosi i le Alii (4)
  75. upu e iloa ai finauga a Samoa ma pulega mai fafo (3)
  76. auala e aga’i ai i faato’aga (8)
  81. Talafaasolo: O le Malietoa na sosoo ma Laupepa (10)
  85. nofoaga e mautotogi ai (4)
  86. Igoa aloa’ia o Samoa (4,9,1,5)
  92. o se ti taumafa (4)
  94. ta’u ai tagata eena i le vasa Pasefika (9)
  95. Suafa atoa minisita & faipule palemene tuana’i: Asi \_ (9)
- LALO ~ DOWN**
1. se isi igoa o le satauro (6)
  2. talatuu: tama na moe ala mai ua atoatoa lona mana (malosi) (10)

PASO SAMOA TAALOGA MAUA LE TAU TUPE

- 3. filifili sau fagafao i le toloa'i (6)
- 4. afa tele o le 1990 (3)
- 5. Pese: Mauga e o le atu \_ (3)
- 6. Minisita Leoleo. Suafa matai (6)
- 7. o se fagaga o mea fafaga (7)
- 9. Saienisi vai: pe a liu le suavai (4)
- 10. musu e fai se fe'au (6)
- 11. Vavau ulugalii o Po ma \_ (2)
- 12. o se i'a e a'e i nisi nuu (5)
- 14. maea u'amea (8)
- 15. saisaitia (se isi upu e tutusa) (6)
- 17. se manu ta'atele o le gataifale (3)
- 18. Ata: Suafa matai palemia a Samoa (4)



- 23. Talafaasolo: se isi suafa Tamafaiga (3)
- 24. Mau Tuto'atasi: Suafa matai o OF Nelson, o le Mau (5)
- 27. pipii lelei (3)
- 28. Se suafa matai i Samatau (3)
- 30. faavae se malo (2)
- 31. igoa o se i'a (6)
- 32. se suafa matai lausilafia, Solosolo ma isi afioaga (5)
- 33. Vaolia: ne'i faapito manu ia ? (4)
- 35. Talatuu: ave'au a Nafanua (5)
- 38. o se ituaiga moega (4)
- 39. taulaga se mea fou (8)

- 41. vala'au (4)
- 42. se nuu gauta o Faleata (9)
- 44. tamaaiga maluu i le Mau (8)
- 51. o se potopotoga e feiloa'i mo se faamoemoe faapitoa (8)
- 52. o se suafa matai Falealupo (5)
- 53. o ni e ta'a'alo (2)
- 54. Maluu: ie taua e mavae ai (6)
- 56. Laau e fai lona fuata (3)
- 59. pogai (2)
- 61. TV: ala e faaali ai se polokalame (6)
- 62. sauni mo le taua (6)
- 63. Tusi Paia: tusi tua'oi ma losua (9)
- 64. Nuuliliu ai le Tusi Paia (4)
- 65. Tifaga: se ata e iai Maui (5)
- 67. o le fu'a o le malo o Samoa, poo lona faavae foi (7)
- 72. "O Samoa e le o se nuu \_" (7)
- 73. se taaloga va o ni e se to'alu (2)
- 74. si'o o se fale, fanua (2)
- 77. se ituaiga 'ava (3)
- 78. e falai ai ai mea'ai (3)
- 79. 'u'u se potoi o masima mmf (3)
- 80. Malosiaga natura: aga a le uila (3)
- 82. fa'aali se lagona le fiafia (3)
- 83. taimi e matua ai fua o laau (5)
- 84. se motu Pasefika (4)
- 86. masina lona 5 tausaga (2)
- 87. pese i le maluu (3)
- 88. faalua ona tupu (3)
- 89. Faipelega: e o ma le so'a (3)
- 90. fau le pa ma'a (3)
- 91. a'u (se isi upu) (3)
- 92. Alefapeta Samoa: leo lona 16 (2)
- 93. Numera 4: sipela (2)



TALI PASO SAMOA LOMIGA 16

T	A	O	L	A	O	M	E	A	S	I	N	A	A	S	A	M	O	A	T	
O	A	A	A	A	A	L	E	F	O	A	U	N	A							
T	A	T	A	L	A	L	A	U	M	A	U	T	A	U	L	A	G	I	A	L
O	O	A	E	G	O	T	L	A	A	L	O	A								
A	V	A	T	U	A	U	M	A	I	L	I	M	U	F	U	A	F	U	A	F
A	I	L	U																	
L	I	V	A	L	I	V	A	S	E	A	F	O	A	A	T	E	A	A		
E	A	A	A	P	A	S	A	O	F	O	A	L	S							
P	O	L	O	A	L	E	I	A	I	M	O	O	P	U	L	U	T	O		
A	E	A	A	U	A	E	N	E	A	A	U	S	E	L						
P	O	L	O	F	E	S	A	A	P	I	I	A	S	I	O	A	A	O		
A	I	E	A	A	A	A	A	V	A	U	I	A	P							
I	N	A	T	I	G	A	N	A	S	A	V	E	A	F	E	F	I	L	O	I
G	O	T	A	A	I	I	N	I	U	U	O	T								
A	T	U	O	L	O	T	T	O	E	A	F	E	A	M	A	K	E	T	O	
L	M	A	M	A	U	U	L	A	U	I	O									
A	T	U	N	U	N	P	A	E	P	A	E	A	A	A	A	P				
G	T	I	L	I	F	U	M	T	E	V	A	G	E	L	I	A				
A	T	I	N	A	E	F	O	N	E	N	O	A	E	I	O	M				
L	A	U	T	A	L	N	G	P	T	A	V	I	T	A						
A	T	O	M	A	O	M	A	T	E	M	A	T	I	K	A	A	U			
U	U	F	U	I	A	O	A	E	A	T	O	L	A	I						
T	E	V	A	G	A	A	M	A	P	U	S	U	A	U	O	U	U			

TALI PASO 16—LUA GAGANA

C	O	L	O	U	R	S	E	N	T
L	E	P	U	V	O				
E	A	S	Y	F	R	I	E	N	D
A	S	D	N	N	A				
R	I	O	T	E	R	S	T	A	Y
L	N	L	M	E	T				
Y	E	S	S	I	R	A	M	E	N
G	E	E	T	A	I				
A	G	R	E	E	R	A	I	S	E
D	U	R	O	E	Z	C			
D	I	N	E	R	E	R	E	N	E

©LPSL Tavita 2023



## Galueaiina o le Paso

E iai se uso faitau sa fesoota'i mai e faatatau i le paso ma lona galuea'iina.

1. Muamua, e fesoasoani le iai o sau tusiupu (dictionary) Samoa ma le Igilisi fo'i. E lelei foi ona lata ane lau Tusi Paia Samoa ona e iai ni isi fesili e faatatau tonu i ai. A iai foi sau komepiuta e lelei foi aua mataupu o le poto salalau.
2. O le tele o isi fesili e maua i lou poto lautele i mataupu o le a'oga ae faapea le soifuaga masani. E iai fesili e faatatau i le aganuu ma le si'osi'omaga faalenuu e mafai ona fesili i matua poo le faia'oga fo'i.
3. Taumafai e tali muamua fesili faigofie poo na e te iloa tali. Matau lelei le aofa'i o mata'itusi o le upu e te iloa i le numera lena e puipui atu. Sipela lau upu pe fetau ma le numera ona faato'a tusi lea i lalo. Manatua e le tasi se tali e fetau. Ft. Fesili, O le a le soa o le Igilisi Rain, e le tasi se tatou upu—timu, ua, uaga, uato, ae sa'o le "ua" 'ona e fetau ma le numera o loo tusi atu (2).
4. E leai se tulafono i le fea e amata ai, poo le faalava poo le tusa'o (lalo), e pule lava oe.
5. O nisi taimi e feavea'i upu ona e tasi le numera, faalava le tasi ae tusa'o le isi, e lelei ona siaki mae'a poo sa'o le numera ma lona ta'otoga poo le faatulagaga.
6. O tusiupu a Milner, Allardice ma lena a Pratt e fesoasoani tele. Iai foi tusi a le Evaleon Books—ESOL English-Samoan Book 1 & 2 e fesoasoani fo'i.
7. E lelei ona fa'aaoga se penitala e fai se titina e faigofie ai ona toe faasa'o se upu pe sui fo'i. Fa'aaoga foi isi tagata e pei o matua, faia'oga, matai, poo se poto faapitoa, e te fesili i ai mo se fesoasoani.

### Fa'aaogaga o le Paso o se auala e faamalosi ai le Literasi

Ua fa'amaonia i su'esu'ega itu lelei o le Paso o se auala e faaleleia ai le sipela, faitau ma le tusitusi a fanau. Talu ai o se taaloga, o lea e faamalosi ai le naunau e galuea'iina. O lena sailiga e taula'i uma i le mafaufau ma faapea ona saga faaleleia ai lona atina'e. Ua iloa i su'esu'ega faavaomalo, e iai lena a Patrick, et al 2018, lona aoga i fanau a'oga o loo fia avea ma foma'i i falema'i, aemaise i le faa-masani i upu faigata o le faiva faafoma'i. Ma isi foi su'esu'ega e faatatau i isi faiva. E siliia se 20 ni tomai taugagana e mafai ona atia'e i le Paso e aofia ai tomai su'esu'e i upu ma faamatalaga ma le vaogagana o mataupu eseese ma sionara o tusitusiga.



TALA MO TAMAITI:

# O le faata'oto o le penitala

**U**

a uma ona fai e le Fai Peni le penitala ona sauni lea e fafao i totonu o le pusa.

A o le'i faia o lea, na ia tautala i le penitala, ua

fai atu i ai:

"Vaai oe penitala, na ou faia oe mo ni faamoemoega sili.

"E ono ni mea e tatau ona e iloaia, a o le'i ou tuuina atu oe e te alu i le lalolagi.

"Ia e manatua lelei nei mea, aua ne'i galo, ona avea lea o oe ma se penitala sili ona lelei, ou te mimita ai.

"Muamua, o le a e faia ni mea ofoofogia se tele, ae tatau ona e faataga oe e 'u'uina e se tasi i lona lima.

"Lua, e te lagonaina se tiga mai lea taimi i lea taimi, aua i nisi taimi e faatamala ai le na te 'u'uina oe, ma soona togi oe pe a ita; ae ui i lea, o se mea e te mana'omia ina ia avea pea oe ma se penitala malosi ma lelei.

"Tolu, e mafai ona e faasa'oina se mea sese na e faia. Lena ua iai le titina e faia lea galuega.

"Fa, manatua o le vaega aupito taua o lou fausaga o lena e pito i totonu ae le o le pa'u i fafo. Ia sili lou fiafia e tusitusi i se laupepa mamā.

"Lima, o soo se mea lava e laasia e lau oosi e tatau ona iloga mai ai se galuega lelei na e faia.

"Tainane poo le a le tulaga, le umi e fa'aaoga ai oe e lou matai, e tatau lava ona e faamaoni i lou tofi."


"Ono, e leai se peni e le aogā. Manatua, o oe o se peni aogā. Aua e te faalogo i se tasi e fai mai e te le aogā. E iai le mafua'aga taua na fai ai oe e le Fai Peni.

Na luelue le ulu o le penitala e ta'u atu ai ua malamalama, ma o le a taumafai fo'i e manatua nei mea uma.

E mafai ona faatusa le penitala ia te oe ma a'u. Na faia ta'ua e le Atua mo ni faamoemoega sili.

A o le'i tuuina mai e ia o oe ma a'u i le lalolagi, o lona naunauga ia e malamalama i nei mea e ono.

Muamua, e te faia ni mea sili e viia ai o Ia, pe afai e te faatagaina o Ia e umia oe i lona Aao.



## E leai se peni e le aoga, aua e iai le mafua'aga na fai ai oe e le Fai Peni

Ia e fa'aavanoaina foi oe i isi ina ia mafai ona e faasoa atu ni meaalofa ua e maua.

Lua, e te lagonaina le tiga o lona faatonu mai ia te oe i lea taimi ma lea taimi. E te lua fetai'a'i fo'i ma faigata o le olaga, ma upu e faalotovaivai ai. Ae manatua, o mea na e saga fausia oe, e avea ma se tagata e sili atu.

Tolu, o iai ia te oe le mafaia e toe faasa'o ai ma faalelei ni mea sa leaga pe faaletonu i lau malaga. O mea na le lelei ona fai i le asō e matimati ai ataeao ma le lumana'i.

Fa, e taua lou puipui i mea o loo i totonu ia te oe, auā o mea taua na. I totonu o iai mea e fuatia ai sou aogā i le olaga. E iai le lotomamā, auā a aunoa ma lena e te le iloa atu Le na faia oe, ma e le iloa ai foi le taua o isi uso a tagata na faia e Ia.

Lima, soo se fe'au poo soo se taleni ua foa'iina ia te oe, e tatau ona e tuu ai lau faailoga o se tufuga limalelei. Tau lava ina avea oe ma se e faamaoni i lou faiva poo le a lava le tofiga ua tofia oe e te galue ai. Auā o lē e faamaoni i mea iti, e tofia o ia e pule i mea e tele.

Ma lona ono, e leai se tagata e le aogā. Faapei o le penitala i le tama ma le teine sogasogā, na faia le tagata e le Atua mo le faamoemoe ia aoga mo le lelei o le lalolagi.

Aua e te fia pei o le isi penitala. E ese lava oe, ese fo'i le isi peni. Na ia foa'i le poto ma se taleni i tagata ta'ito'atasi, ona e iai le mafua'aga na ia avatu ai lena taleni ia te oe.

Lenei, o oe le peni, tuu oe i le lima o le tusitala na malū ai le sami. Tuu oe i le lima o le tufuga tusitusi na ia faia oe ma a'u, ona e tilotilo lea ia te oe, ma e iloa atu le taua o isi fo'i peni.

Tuu oe i le aao o le tufuga na faia oe, ma a'u, ma i tatou uma, na te tusia se tusi matagofie ia te oe.

Ua uma le tala tamaiti, ae su'e ane ni ona lesona tāua. Manuia.

O SE TASI O PEPA O LE MEASINA LONA IVA A SAMOA 2023: DR PSL TAVITA

# E LE UTUFIA LE UAINA FOU I FAGUPA'U TUAI: O SE VAAI FAASAMOA I LE TOFAMANINO O LE FUAAO FAALEAGANUU MA ONA LUAFESASI

Folasaga Tomua:

O lenei pepa o se iloiloga i le tulaga o le pule ma ana fāiā i totonu o Samoa. Ma e aga'i tonu se matau toto'a i le va'ai faa-Samoa i le mau faatofa manino a le alii su'esu'e o Antonio Gramsci, o ia e ana le faaupuga 'fuaao faaleaganuu,' pe i le gagana Peretania, cultural hegemony. Ua iloa le malosi o le tatou aganuu o se ta'ita'itama ma se ta'iala i soo se vaega o lo tatou olaga o se nu'u. Pe i upu a se fatu-solo, Tatou te manava ai, ma gaoioi ai ma avea foi o se auala e soifua ma ola ai. E le fesiligia, o lo tatou tofi tuufaasolo mai tupulaga ma tupulaga, ma o loo fa'aaauu pea e i tatou foi. O lona malosi o loo molimauina pea ia tatou talanoaga faalenuu. E pei o lona e faapea mai, e malu le lotu ona o le aganuu. Ae fai mai fo'i le lotu, e le tau soaina le talalelei e se isi malosi. E faapena fo'i aga o talanoaga i le va o le malo ma pulega a alii ma faipule i afioaga.

O lenei la iloiloga o le a taumafai ai e faatu ni fesili i le faamaoni o sea mau poo mau, e iai le fesili autu lenei, Poo fea tonu o ta'oto ai le pule, e fia pule i Samoa, ae faapefea ona tatou fa'aaoga lenei pitofilo faalemalo a Gramsci e faamatala ai mea moni o loo tutupu, o nisi mea e lilo i le tatou va'ai masani? I le tali atu a le faipepa i le finauga e faapea, E iai molimau e faamaonia ai le mau a Gramsci i le fuaao a le tatou aganuu. Peita'i e ao ona manino le tulaga lea, talu ai ua avea le aganuu o se tapu e le fesiligia, ua mafua ai le le matuā manino i lona pule ma ana fāiā, poo ni tali 'anoa i fesili sa ta'ua. Auā o le fesili e gata ai fesili i nei aso o faigamalo temokarasi, O le a le pule? O ai tonu le pule? O ni vala nei o le a taumafai le faipepa e asia, ae taualuga i la'u mau e fia faamautu, e faapea, e tulaga ese lava le fuaao faa-Samoa mai isi fo'i nuu ma a latou fuaao.

Upu taua i gagana e lua: fuaao faaleaganuu – cultural hegemony, fuaao – hegemony, faavaagalua faapitofilo – theoretical framework, tofa manino – philosophy, pitofilo – theory, atagalua – model, faamalo – political, upufai (o malo) – politics, Pitofilo o le Tofa Fesili - Critical Theory, su'esu'ega – research/study, Pitofilo o aga fesilisili – postmodern theory, faavaa – context, taofisā – ideology, pulega – governance, vala – juncture, oloa faaleaganuu – cultural capital.

A o le'i folasia se manatu, ae muamua lava ona faailoa atu le lisi o upu o le a ou fa'aaogaina. E taua lea mo le manino, o nisi o upu atonu e fou i le faafofoga. E le o po se lilo, o loo atia'e pea a tatou fo'i upu, pei o le pitofilo mo le theory sa ulua'i faailoa mai e Aiono Dr Fanaafi Le Tagalao. E faapena le tofa manino. O le upu taofisā ua ou fa'aaogaina e soa ai le ideology. O le upu fuaao ua ou fa'aaogaina e faatatau i se pule poo se taupulega e le agaia e se isi malosi, e soaina le upu hegemony.

Folasaga Lautele

O le tete'e a le aufaigaluega i le 1981, le nunu faaupufai i le 1982, na fagua ai i tatou i le ma'ale'ale

o lo tatou si'osi'omaga, le faafuase'i e o'o i ai suiga o upufai pe a lugaluga le tau. E faapena fo'i i le mataupu o le 2021, ua silafia lava, ma o na uma e molimau i le vave ma le faafuase'i ona liu le tai, ma toetoe ai e toe alo lo tatou vaa i tua, i na fatia o taua ma fevaevae'iga. E molimau le talafaasolo i Taua a Aiga o Samoa, afua mai i le 1848 e aulia mai lava le 1889. Faapena foi taimi o pulega a papalagi. O le fesili, aisea le vevesi i na fatia, ae o'o mai ia tatou tupulaga ua le faapena? Moni e vevesi i upu ma tala ae o loo to'a pea le tai? Vevesi mai Fiti, Papua Niu Kini, Toga, Solomona, maliliu tagata, a o loo mau pea le toovae a Samoa. O le a le mealilo i 'i? Ae faapefea ona faamatala?

Lona lua, i le tula'i mai o le malo poo le setete o se pule e ta'imua i upufai o Samoa, ua tofotofoina ai le tulaga o ana fāiā, poo le nofoāpule i totonu o Samoa. Mo se faata'ita'iga o le tula'i mai o le HRPP o se faigamalo malosi. O lona malosi e molimau i ai lona fuaao i isi vaega faaupufai ma pulega mo se taimi umi. I lona agaga fia malamalama na afua'ua ai so'u taofi, e mana'omia se meafaigaluega lelei, se tioata su'esu'e e manino ai la'u tilotilo i mea o loo tutupu.

O lea na ou filifilia ai le faavaagalua faapitofilo ua ou faaigoa, o le Pitofilo o le Tofa Fesili. E le o se aga e masani ai la tatou aganuu e fesili, pe fesiligia le pule i ana mea e fai, ae manatu fo'i e le 'alofia le tulaga o tapulaa ma tulafono o su'esu'ega faaonaponei. O la'u faavaagalua e le feteena'i ma le pitofilo o aga fesilisili (postmodern) ae femolimaua'i. O na tu faalesu'esu'e e maua ai i totonu ia tofamanino a ni alii faitofa se to'atolu - Michel Foucault, Pierre Bourdieu, ma Antonio Gramsci. O nei alii su'esu'e ma a latou galuega, e le nafataulima i lenei pepa faatauvaa, ae ua na o ni vaega taua ua fa'ifa'i mai o a latou tofa manino, e fai ma molimau. O lenei pepa e faavae mai i la'u su'esu'ega mo le tusipasi o le foma'i tofa manino, pei ona ta'ua. Ma e maua se ata atoatoa o la'u galuega, i luga o le upega tafailagi [www.ola888.com](http://www.ola888.com).

La lea ua mautu atu la'u mafua'aga i le su'esu'eina o le mataupu, o le a taumafai loa e saili se tino o le autu e feauga ma le sini o lo'u faamoemoe. Muamua lava o le upu pule, ona o le fatu lea o le faaso. Talitonu ua nofoilo le aofia i lona uigalasi, ae e fia tata'i le faafofoga i lona fa'aaogaga i upufai o malo, i le faavaa o pulega faatemokarasi ma sa'oloto. Ua malosi le ta'a'ina a le Igilisi i le upu power ma lona fa'aaogaga faalētatau, ua tau galo ai le va'ai faa-Samoa lava ia i le pule o se mea lelei, e faia tonu lelei ma ni suiga lelei. O se faamanatu lea a le faipepa a o fa'aaauu le tautalaga.

O le pule i le va'ai faa-Samoa pe faa-Polenisia fo'i, o se vaega lava o le ata atoa, e le o se totino e tu ese mai ae o se malosi e lotolotoi ai i le moa o se faiganuu poo se sosaiete. E iai e pule o le nuu, i o latou tulaga ma faavasegaga faaleaganuu. O alii ma faipule e faia tonu o soo se mataupu lava, e le faigata le faata'otoga o le pule ma ana fāiā i lo tatou si'osi'omaga masani. Ae na luagia lona pule ina ua ofi mai ia pule fou, i faigamalo faakolone a malo malolosi, faapena fo'i le pule faalelotu ma le temokarasi. Ma i nei aso o le tula'i a'e o vaega faaupufai, ua matauina ai fo'i ni suiga, aemaise i le galuega faamaopopo e o faatasi ma le pule. E pei a o le upu, o le lou ma lona fuata, lenei e foliga ua fai e le Lotu ma vaega faaupufai le galuega

o le faamaopopo, sa fai e Tumua ma Pule ma Aiga o Samoa. Ae faapitoa i le tula'i mai o le malo e ta'imua i le faasoaga o lona pule.

A matau toto'a la aga o le pule ma lona feliiua'iga mai lea taimi i lea taimi, e iloa ai le tulaga o se faiga su'ifefiloi. O le pule auliuli sa iai a o lei taunuu isi pule mai fafo, ua liua lona auliuli i se na tuu'aulafoga, e tula'i mai ai se isi auliuli fou, i se laasaga faagasolo. Lenei la a talanoa i le pule a le malo, e le mavavae esea ma lana fāiā faaleaganuu, auā o minisita ma faipule o ni matai fo'i faaleaganuu. E faapena fo'i i lona fāiā faalelotu, auā toe o tagata Samoa uma e lolotu pe talitonu i le Atua. O le minisita ma le faipule o ni sui lava fo'i o a latou ekalesia ma mafutaga tapua'i. I nisi upu, e fetāla'i ma fesoota'i le pule Samoa, e feuluulu-a'i ma fesaua'i ma feaiaa'i.

Lona lua o upu ou te fia faamanino mo lenei pepa, o le aganuu. E tutusa lava nei upu e lua, pule ma le aganuu, e tafalasi o la'ua uiga poo faauigaga. Ae talitonu tatou te autasi i le faamatalaga faavae ma faigofie, o se faiga e soifua ai ni tagata poo se nuu, ia latou tulafono, aga fealoa'i ma tu masani. Tatou te autasi foi e le tumau se aganuu ae fesuia'i pea ma aga o le taimi ona o le poto ma le malamalama e tupu pea. E ao fo'i ona tatou sauniuni i suiga e tula'i mai ai.

I le faauigaga a le alii faitofa ia Gramsci, o loo ia fa'aaoga ai le upu aganuu o se faiga e tupu pe iloa i malo faaonaponei, o na e fefiloi ai tu ma aga tuai faatasi ma tu ma aga fou. Mo se faata'ita'iga o le tulaga o Samoa, e fa'aaoga le temokarasi i ana tonu fai atoa fo'i ma le soalaupule faa-Samoa. O le uiga lona o le aganuu o loo fia faataua mo lenei pepa, o se upu e taao'fa'i uma ai le si'osi'omaga Samoa i auala o pulega fou faatasi ma pulega tuai.

O le fuiupu fuaao faaleaganuu e faatatau i lona malosi'aga lē agaia o se aganuu faapea. Ma i le taofi o Gramsci, o se malosi'aga lenei e le 'alofia e se isi, ae mafai fo'i ona fa'aaoga mo le manuia o tagata uma. O le a ou talanoa loa i le upu 'luafesasi.' Ona pau lea o le tatou upu e tau felata'i ma le Igilisi, dilemma. O loo faapea mai le tusiupu o le upu 'dilemma' e faatatau i se tulaga faigata e omia ai se tagata i le va o ni filifiliga se lua. Sa fa'aaoga e Tupua Tamasese lea upu i se tasi ana pepa, e faamatala ai le tulaga laufetoa'i o pule i o latou tua'oi.

O le fesili, o fea e vase ai le tua'oi o le pule faalemalo ma le faalelotu ma le faaleaganuu fo'i? O le tali e le faigofie. Auā o le taofisā e faapea, o Samoa o le aiga, ona o le aiga, e le faia e le malo se tonu e afaina ai le lotu poo le aganuu. Poo ai lava e ana se tapu, poo le aganuu poo le lotu, e tatau ona amana'ia e le malo. Faapena fo'i tapu a le malo e tatau ona amana'ia e isi pule e lua. Mo se faata'ita'iga, o le tapu o le lafoga mo faife'au. Ua tele tausaga o faamamalu e pule uma e tolu, se'ia suia lona e le tulafono a le malo na se'i mavae, ma faamalosia fo'i lona faatinoga. O se suiga e manatu se vaega o le itupa a le lotu ua sala ai le malo i le va fealoalao'i. E le na o se va fealoalao'i, auā i le vaai faaleaganuu e taua feagaiga i aiga. O le luafesasi tonu lea, i le mau eseese i le faatinoga o le pule

faanonaponei, avea ai le malo ma faatonu sili. O le malo e tu mo le faamautuina o tapu faapulega malo temokarasi, e ave ai le faataua i le ola tutusa ma le faailogaina o se tasi poo se ituaiga. E fetoa'i lea ma le aganuu e manatu e iai tapu e le o'o i ai le pule a le malo. E pei o le faatauaina o feagaiga poo faifeau.

Aemaise lenei, o taofisā a se nuu e iloga le faatauaina e tagata lautele. Ou te fia aumaia se mea na tupu, o loo o'u ta'uina i la'u galuega, i le va o le lotu ma le malo. I le 1976 na fuafua ai se atina'e a le malo e a'afia tonu ai eleele o se tasi ekalesia. Talu ai e le na o se eleele a o se nofoaga e taua i le ekalesia, o lea na le faigofie ai ona faamatu'u atu i le mana'o o le malo. E tusa ma molimau o lena mea na tupu, e au ina vevesi pe 'ana leai le tofa mamao ma le faautaga loloto i itu e lua. Ae o le uiga o sa'u faamatalaga, e iai tapu faaleaganuu e le fo'i ai se tagata i lona puipuiga ma le faamamaluga. O le fesili, Aisea e faapea ai? O le tali, o le finagalo lea o tagata. Tagata lotu, tagata o le aganuu, a o tagata fo'i o le malo o Samoa. O le fesili, E faapefea la tapu o le tulafono o loo tausia e le malo ma le faamasinoga?


A tatou tilotilo teisi i tua atu o lo tatou tala, ona manino mai lea o aga o lena pule faalemalo, aemaise i faigamalo kolone, na to'esea ai ni vaega eleele mai afioaga ma tuuina atu i le pule a le malo. E faapena le pule faalelotu i eleele sa foa'i e aiga ma nuu i le lotu. O na foa'i sa faia lava i upu, ma sa tuu'autapu tua'a i le tausiga o na feagaiga. O nisi o na eleele ua toe faafo'i atu i tagata ma nuu e ona, e faamaonia ai, e mafai ona fetuutuuna'i le tofa i le tausiga o tapu mai lea taimi i lea taimi. O le mafaufauga e faapea, o le mea ua talafeagai ma le mana'oga o tagata mai lea tupulaga i lea tupulaga. Ona ua fa'aopoopo le numera o tagata, ua talafeagai ai le toe faamatu'u atu o latou lava fanua ma le pule ia i latou. O le tali la i le fesili pe mafai e le malo ona fa'aaoga faamalosi se mea totino a se isi pule. O le tali, e mafai i lalo o le pule lē agaia a le tulafono, ae e iai lona. Auā afai sa mafai i ona po o pulega a papalagi, ua le o toe talia gofie i nei aso o pulega malamalama, o lea fo'i ua faafo'isia le mamalu o pulega faa-Samoa, e faamua ai le tausiga o le va fealoa'i.

E molimau lava le talafaasolo, i le tete'e a Samoa e pei ona iai le Mau a Pule ma le mau o le tuto'atasi; auā pe fai mai o tapu o le faamata'u, ae le'i fo'i ai; faapea fo'i le tete'e a se ekalesia i le fuafuaga a se faigamalo e fa'aaoga so latou fasi eleele. Ae faapea le tete'e a le aufaigaluega i le 1981, le tete'e a se ekalesia i le mataupu i le lafoga e fai i le malo. E ta'u mai ai, e iai taimi e fesopoa'i ai faamanuvale ia pule i tua'oi o tapu o le va vealoaloa'i, pe a faataumatatao. Aisea e faapea ai? O le tali a lenei pepa, e mafua fetoa'iga poo ni luafesasi ona o aga o le pule lava ia, I se tasi o pule e sosofa le va ae tete'e mai isi.

Ui ina aliali i luma le pule a le malo, ae iai fo'i pule e taule aliali i luma a o loo iai lava, e iloga la latou pule i loto ma mafaufau o tagata. E pei o le lotu, auā a faatulaga le fale o Samoa i ona pule i nei aso, i so'u taofi na o a'u, ua iai le pou o le lotu, pe nofoia pe leai, ae o loo iai i maui o isi pule o loo e'eta'i ai i tonu fai o le malo. O latou lava o sui o le lotu i le malo ma ona upufai, ma soo se pulega faanonaponei. E mafua ai se taofi o le faipepa, e tafatolu le nofoapule a Samoa. Muamua, le malo.

Lua, o le aganuu, ma le tolu, o le lotu ma isi pule na afua mai fafo, ua avea lava ma totino o le pule Samoa.

#### FETI'I O LE NOFOĀPULE SAMOA TUTO'ATASI



O lenei nofoapule o le atoali'o lea o la'u faatatau i le upu, fuaao faaleaganuu. Lona uiga ua le pumoomoo se faauigaga o le upu aganuu ae o se milosaga o ni pule se tele. O lea ua ese mai ai sa'u faauigaga i na isi su'esu'ega e vaevea le pule i ni vaega se lua, o le malo (state) le tasi itu a o le pulega faamatai le isi itu. O sa'u finau, e iai le pule fou, i le lotu ma le aufaasalalau, ma isi, e ao ona faitaulia, ui ina tau le iloa atu sa latou pule i tonu fai o le malo. O nei uma pule ua mafai ona nonofo faatasi e mafua i lo latou taliaina o taofisā mai tua'a anamua, ma talia fo'i e le puletua ia le ta'ita'iga a e ua umia le pule.

E pei ona ou ulua'i ta'ua, e to'atolu ni faitofa i le mataupu i le pule na ou nono mai ai ia latou tofamanino. O le a ou taumafai e aotele atu ni o latou sao i lenei mataupu, ae faapea ni aoga i le tatou talanoaga faalenuu.

Muamua o le alii faitofa ia Foucault. Faapea mai o ia, tatou te maua le pule i sootaga ma mafutaga a tagata. E leai se pule e tuto'atasi, pe tino mai i se tagata se tasi poo se pule se tasi, ae pei o le vai e feulua'i ma feliu'a i foliga e tele. E atoa le pule. E pei o se aiga i ona sootaga ma faiā, a leai le tina e leai tamā, a leai le fanau e leai tamā ma tina. A fa'aaoga le mau a Foucault, lona uiga e le vavae esea le tautua mai le pule, e pi'i faatasi. E peisea'i e fai mai, e pule uma oulua. Pe faapea fo'i, o tagata uma o tautua a le pule. Atoa fo'i ma lenei, e leai se pule poo sana faiā e ta'ata'a mamā. E mafua ai lana folafolaga, 'all social relations are power relations,' 'o faiā uma faaletagata o ni faiā faalepule.'

Lona lua, le alii faitofa o Pierre Bourdieu, i lana mataupu o le oloa faaleaganuu ma faalenuu; faaleaganuu e faatatau i o tatou tamaoiga i agavaa, tomā, tulaga faalupe ma tofiga i totonu o a tatou mafutaga ma taupulega; faalenuu e faatatau lena i le tamaoiga o tu ma aga taualoa e iai le ava fatafata ma le tausiga o le va lelei, mo ni faata'ita'iga. O lē e iai mamalu, tofiga, le poto poo le tamao'iga i tupe ma meatotino, o ia fo'i lena e umia le pule. O pulegamalo, o faatusa i latou o lena pule, faapea soo se pulega lava pe faalelotu, faalegaluega pe faaleaganuu foi. O na vaega e lua i le taofi o Bourdieu, o loo aofaga ai le pule ma e le faigata ona iloa le faamaoni o sea taofi.

E le na o tupe e iloa ai le pule, e iloa i le suafa taua poo le tofiga mamalu, ae o faatasi ma measina faalenuu e iai le fa'aaloalo ma le amana'ia o ta'ita'i poo e ua tauavea na mamalu mo ni pulega poo ni mafutaga. Sa ou ta'ua le suafa o Antonio Gramsci, i lana tofa manino o le fuaao faaleaganuu. O le mau a Gramsci, ua tutu malo faanonaponei i faavae e filogia i taofisā ma auivi o pulega ma faigamalo tuana'i. Ui ina taulagi le temokarasi e faatino ai pulega malo i nei aso, ae a susu'e teisi a'e i luga le vala, e le fou le tele o mea o loo faavae a'i. O se faata'ita'iga, o le faavae o Samoa, o le Atua Kerisiano, ae i tua atu o loo tuu mai ai le tapuaiga a Samoa sa faafilele i ana tapu anamua ia Tagaloa ma atua o le fanua ma aiga. O matai o pulega anamua o loo fa'aaauu pea i pulega faanonaponei. O iai tulafono ma tapu a malo faanonaponei, ae taua fo'i a tatou tu ma aga fa'aaloalo o loo maopoopo ai nuu ma tausai ai le nofo lelei. Aumai i le autu o

lenei faasoa, i le upu a le Alii Faola, e tataua ona utu le uaina fou i fagupa'u fou, e mafua ai se taofi, na sui a tatou fagu teu uaina i le 1962, ina ua toe maua lo tatou sa'olotoga i pulega mai fafo. Fagupa'u fou o la'u faatusa i auivi o pulega faanonaponei. Uaina fou e faatusa i tu ma aga o pulega o loo ua tatou tausia ma soifua ai i nei fo'i tupulaga.

Sa ou ta'ua ia vevesi sa feagai ma Samoa, i nisi mataupu na iloga le si'isi'i ai o lagona e le o po se lilo. Ae sa mau lava le toovae. Faafia ona vevesi Fiti ma isi nuu o le Pasefika ae o loo mafai pea e Samoa ona faasaoa lona sa i matau. Ma ou te ioe fo'i faatasi ma isi, o se vi'iga lea o le aganuu a Samoa. O se vi'iga fo'i mo le talalelei ma le galuega a le lotu. O le fesili pe faapefea? O la'u tali, e mafua i lena fuaao faaleaganuu e pei ona ou taumafai e faamatala. O se fuaao ua mafai ai ona tuufaatasi ni malos'aga faitaulia, i le malo tuto'atasi temokarasi, le pule fou i le lotu ma na e iai le galuega faasalalau, atoa fo'i le pule tuai umia e matai ma Aiga o Samoa. Ua feutaga'i ai i le faasoina o le pule. E mafua ai so'u taofi, e tu ese mai le fuaao faaleaganuu Samoa i fuaao a isi malo, auā o Samoa e iai lana aganuu o le va, e lotolotoi i totonu o ana upufai, pe faalemalo, pe faalelotu, pe faaleaganuu. Ua avea ma taulaga o se pulega soofaatasi e malosi ma mausali.

Ua tatou tilotilo ma matau aga o pulega a le tele o faigamalo i nei aso, i le fa'aaoga o le malosi faaletulafono e fofo ai faafitauli. I Samoa, e mulia'i taunuu leoleo, a ua galulue le pule a alii ma faipule e faafilemu se vevesi. O molimau na i itu lelei ma taua o le tatou fuaao faaleaganuu.

Peita'i e le 'alofia, o le va fo'i lena o loo avea ma se to'atuga i lo tatou aga i luma. Auā a le lelei ona tausai e afaina le nofo lelei. E pei a o le aiga, e pisa pe a le iloa e le tagata lona tulaga pe faatamala i lona tiute. E avea fo'i lena nonofo faatasi ma auala e le sa'oloto ai le filigā ma le ma'elegā, auā e pao atu e le matua le laitiiti. Ma tulaga faapena. Sa ou ta'ua nisi o mataupu e a'afia ai ekalesia i le va ma le malo, aemaise le taua o tapu e tausia le aganuu o le va mo Samoa ma ona tagata. A faatalale le tasi pule, e tete'e mai isi pule. I le gagana o nei aso, a le fiafia le 'aupalota i le malo, e fa'aali i la latou palota. A fiafia fo'i, e fa'aali lava i le palota.

I le tausiga o le va, ua tatou mafatia ai fo'i, pei ona molimau ni sui auai o la'u su'esu'ega. Fa'aaoga e nisi le upu 'pologa.' Ma o se tasi lea talanoaga e tutasi fo'i, ui ina fesoota'i ma lenei talanoaga. Pau lea, ou te talitonu ua iai i le pule le poto ma le mafaia e tineia malie ai le upu 'pologa' mai a tatou tu ma aganuu, ae sui le talanoaga i se tasi upu tausaaia.

Lona lua, o se popolega e tula'i mai ona o lena fuaao faaleaganuu, e taaofa'i ai tagata ma vasega o tagata i le ta'u, o Samoa o le aiga. Ou te le fesiligia le moni o le faitau, auā o Samoa lava o le aiga, ae e ono avea ma se faanoi poo se 'alofaga i le faataunuuina o tiute mo vasega o loo pito i lalo o le faasoa a le tamaoiga, poo le faasoa i mamalu ma tulaga taualoa, atoa fo'i avanoa mo e faasinoesea pe iai mana'oga faapitoa. O sini mauululuga na o faiganuu, faigalotu ma faigamalo i nei aso, ia faaleleia tagata ma vasega ta'itasi uma, ae ina ne'i avea le ta'u o le aiga e musu ai e faaleo se lagona mafatia, ina ne'i afaina se finagalo, poo le ta'uleleia o le aiga. O se tasi popolega lea i vaivaiga o le fuaao faaleaganuu.

Aotelega:

Ua lamalama faaii le tautalaga, ae ua ou manatu e toe fo'i i le amataga o la'u folasaga, i le finauga poo ai

## E le utufia le uaina fou i fagupa'u tuai

le pule e sili. E pei ona ou ta'ua se taofi taatele e foliga e faasili ai le aganuu i le lotu. O le tali a nisi o susuga i failotu, e le tau faamamaluina le lotu e le aganuu, auā o le tala lelei a le Atua e molimau ia te ia lava. E iai fo'i le tofa manino e faapea mai, o le malo le pule i nei aso. Atonu e sa'o lea i nisi malo temokarasi ua vaivai ai le lotu ma pulega tuai, peita'i o Samoa e le faapena. O le fesili la, Poo ai tonu le pule i Samoa. O la'u tali, e le o le malo, poo le lotu, poo le aganuu, a o lena soofaataso o le nofoāpule i le malaefono o le va fealoaloa'i.

O lena va e faatino ai le pule ma le tautua i le taimi e tasi. O le filosofia a Samoa i le pule ua silafia lava, o le ala i le pule o le tautua. Ae e iai foi le isi ona uiga lilo e lei iloga ona faailoa, pe a liliu le faaupuga faapea, o le ala i le tautua o le pule. O lona uiga e le se muta'aga le pule, a o le auala e tautua ai i upufai o nuu ma le malo fo'i. E femaliliea'i lea ma le mau a le alii faitofa ia Foucault, i le pule o se mea atoa. O tatou uma o tautua a le pule.

Ae peita'i e iai le tiute o le malo i isi uma pule, i lona tulaga o le mua'au i le folauga a Samoa o se malo. O lena tiute e ta'imua ma faasinoala i le malaga, e le tasi ae lasi ona tafa. E iai le puipua o tofi, agaifanua ma talitonuga o ituaiga eseese. Faapena aia tatau a tagata uma e le faailogaina se isi. La lea e iloga se sao o le malo i le tapenaina o le va lelei o le nofoapule, ina ia mafai ona faataunuu ana fuafuaga mo le manuia o vaega uma, aemaise o i latou e leai ni pule pe le faitaulia i taupulega.

Upu faai'u:

I lenei pepa sa ou taumafai e faamanino le uiga o le upu aganuu poo le pule e iloa ma le aganuu, e le pumoo, ae lautele ma loloto lona faauigaga. Pei lava

o le faatusa o le faipule i le palemene, a o se matai fo'i i lona nuu, o se tiakono o lana ekalesia a o se tautua fo'i i lona aiga. Sa ou ta'ua le luafesasi, o ni mea e le ma'alofia i lo tatou si'osi'omaga ona o aga fou o se aganuu fuaoa faaonaponei, ae e mafai lava ona faatonutonu, aemaise i taimi e to'ia ai le va lelei o le nofoāpule.

Ua mae'a ona filifili Samoa i ona ta'ita'i i le faiga e maua ai le nofo lelei o ona tagata, i totonu o se aganuu fou pei ona ou faamatala. O se ituaiga fausaga fou o aganuu fuaoa e talitonu i latou e lelei mo Samoa. O se fusiga o talitonuga, tu ma aga fefiloi ae faatonutonu e le faautaga poto, lautua i le alofa ma le va fealoaloa'i.

E taua le va, e ogatotonu le va, e nofo le pule i le va, e sufi le pule i le va, e tausi le tulafono i le va, e le ina faavaivaia ai, ae atili faamalosi ai; e manuia Samoa i le va, e lamatia fo'i Samoa i le va. Ma o le tulaga tutasi lea o Samoa mai isi malo, e avea ai lenei fuaoa o se malosi'aga e mafai ona faaleleia pea, ae sili ai lenei, o loo maopoopo ma nofo lelei ai o tatou tagata.

I lenei lava itula o le talafaasolo o le lalolagi ma le vevesi o loo afaina ai tagata o Ukraine ma Rusia, Isaraelu ma tagata Palesitina, e molimau i le fuaoa a malo malolosi, aafia ai malo laiti, e saga manino ai le vaai i tua i mea sa tutupu i lo tatou tala faasolo. E 40 tausaga o feagai Samoa ma taua i le va o ona Aiga, 60 tausaga i lalo o pulega a papalagi, ma o se faamanatu taua i le toe auga o fagupa'u tuai, o le pule e saili i 'a'upega ma le malosi faafitafita. Ma ou te matuā ioeina le fautuaga a le Alii Faaola, e le aogā ona toe utufia le uaina fou i fagupa'u tuai, ae utu i fagupa'u fou, e faatausaogalemu ai (Mareko 2.22).

Ma le toe faamanatu, o soo se uaina fou ma tofo lelei, e mafua ona o toega o mea lelei mai soligavine a tua'a o ananafi.

## Tulimanu o Pola:

E mua pea le faafetai i le Tamā i le lagi, i lou soifua ma so'u malosi ua tatou toe fesilafa'i ai i lenei fo'i taeao manino. Malo le soifua maua.



E pei ona logopuialii le mamalu o Samoa i le fono faavaomalo lona 9 a le Measina, o lea foi sa ou taumafai ai e auai e fia iloa se mea aoga mo lo'u faatauva'a. Ia, e lei fesiligia lava le itu na ou alu i ai, o lena e faafoe i le Gagana Samoa. Upu moni lava, 'ana faaliu mea'ai faasoa o aso e lua, tulou, ou te le iloa faamatala. Faafetai, malo le faasoasoa.

I la'u faalogologo atu i nisi o sui usufono, fai mai e malie ese lava le siuleo o le matagi mai sasa'e, sa ou faapea o le aufaipese foi lea mai Saanapu, ae leai, na ou iloa ane, o le usuga fono mai le motu o faafiafiaga. Ia, malo le saasaa Telei'ai ma le usugafono mamalu. I nei aso, e iloga le ti'a e malie e lia'i i le vateatea, ae toulou ifo ai pepa e aoga mo faatau.

O nisi o pepa sa faatatau i le tulaga o a'oga ma le to'a o loo molimauina i le Literasi a le fanau. Sa ou fiafia lava i le faasoa a le alii faatonu sili o le Matagaluega, aua sa afea ai lea tulaga, ae na ese foi le tulimanu sa dackle ai e lana afioga. Sa talanoa o ia ia Bruce Lee ma tagata faitifaga ta'uta'ua. Manino le fe'au, e mana'omia e tatou ia Bruce Lee ma Chuck Norris e faia a'oga a le fanau.

Lena, o le faia'oga le ki ma le tatala. E pei ona feauga le faatusa a le Faatonu Sili, e taua le tapenaga o se tagata faigaluega, e taua foi le faamaoni ma le filiga i le vala'auina.

Ui o lea ua si'i le tatou galuega i Samoa, ae le vaea ai fala ooto, e avanoa pea la tatou puletini i se tala mai Aotearoa ma fafo atu, ae avatu le faafetai i pa'aga a lenei tautua, i lau tou lagolagosua, a o mafuta ai i lena itulagi. Ui ina sui le nofoaga, ae le suia le sini o le faamoemoe, tauola mo a'oga, i si tatou lava Gagana. Se upu ua sala faafo'i mai. Manuia.

## O ni ata o le fonotaga Measina 9, 2023



TOFAMANINO A TUI ATUA: MAU A KERISO

I soo se mataupu e aafia ai le amiotonu, e iai le sao o le mau faa-Kerisiano.

## NIUPAC PUBLICATION

Email: [ola-niupac@gmail.com](mailto:ola-niupac@gmail.com)

Phone: 02102567412

Facebook: [ola-puletini-a-oga](https://www.facebook.com/ola-puletini-a-oga)

Website: [www.ola888.com](http://www.ola888.com)

### OLA PULETINI A'OGA

LPSL Tavita, PhD (1st Editor)

[ltavita8@gmail.com](mailto:ltavita8@gmail.com)

Muliagatele Vavao Fetui, PhD

[v.fetui@auckland.ac.nz](mailto:v.fetui@auckland.ac.nz)

Salā Saili Aukuso, PhD

[saili.niupac@gmail.com](mailto:saili.niupac@gmail.com)

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. OLA acknowledges and defends the rights of other copyright holders whose material we borrow and acknowledge accordingly.

NIUPAC 2011